



L. eleg. g. 418^{er}

189^v

Heusde

of 115. lat. 12.493.

ORATIO

DE

ANTIQUA ELOQUENTIA
CUM RECENTIORE
COMPARATA,

QUAM HABUIT


PHIL. GUIL. VAN HEUSDE,

A. D. XXVI JAN. ANNI MDCCCIV.

QUUM IN ACADEMIA TRAJECTINA
HISTORIAE, ANTIQUITATIS, ELOQUENTIAE
ET LINGUAE GRAECAE PROFESSIONEM
AUSPICABATUR.

TRAJECTI AD RHENUM,
APUD O. J. VAN PADDENBURG,
ET GUIL. VAN YZERWORST,
ACADEMIAE TYPOGRAPHOS.

MDCCCV.



URBIS TRAJECTINAE

R E C T O R I B U S

E T

A C A D E M I A E

C U R A T O R I B U S

VIRIS AMPLISSIMIS

S.

„ Antiquitas eam meretur reverentiam, ut ho-
„ mines aliquamdiu gradum sistere, et supra eam
„ stare debeant, atque undequaque circumspicere,
„ quae sit via optima. Quum autem de via bene
„ constiterit, tunc demum non resistendum, sed
„ alacriter progrediendum. ”

BACO VERULAMIUS,
De dignitate et augmentis scientiarum.

L. I. p. 20.

A D

VIRUM CLARISSIMUM

PHIL. GUIL. VAN HEUSDE,
J. U. D.

ELOQUENTIAM ANTIQUAM
CUM RECENTIORE
COMPARANTEM.

Eloquio prisci dum comparat Heusdius aevi

Eloquium, nostro tempore quale placet,

Ipse suo exemplo docuit, quo tramite eundum,

Doctus ab Antiquis, quo decet ore loqui.

Tous. WOORDHOUDER.

A D
VIRUM CLARISSIMUM
PHIL. GUIL. VAN HEUSDE,
QUUM
VETERUM AC RECENTIORUM
ELOQUENTIAM
ELEGANTISSIMA ORATIONE
INTER SE
COMPARASSET.

Qualis ab Antiqui, qualisque Recentior aetas
Quem tulit, auctoris gratia ab ore fluat,
Heusdius inquirens, cuius sit causa tuenda,
Ingenii summâ fertilitate probat.
Hujus et illius meritis favet arbiter aequus,
Discrimenque sagax inter utrumque notat.
Maxima fit priscis data sic victoria; sed, ni
Tam bene dixisset, grandior illa foret.
Nam Veteres quod nos superarent flumine linguae,
Heusdius eloquio destruit ipse suo.

HIERONYMUS DE BOSCH.

HEUS-

HEUSDIO suo.

Eloquium Antiquis dederat natura disertis,
At ars Recentioribus;
Te, quem facundum naturâ atque arte videmus,
Priscum putemus an novum?

Jo. Ad. NODELL.



Orationis hujus quod olim fuit conscribendae, idem nunc est edendae consilium. Totum hoc spectat literarum et historiae et humanioris omnino doctrinae in hac Academiâ studiosos. Antecedente anno ita tradere historiam gentium studui, ut aditum praeberet ad civilem prudentiam: artium ac literarum rationem in Rhetoricis lectionibus explicans. Insequente autem anno
his-

historiam gentium cum artium ac literarum historia conjuncturus sum, ut magis etiam juvenes, tum ad suam singuli disciplinam praeparentur, tum ad plenam universi rerum humanarum perspicientiam ducantur. Quod quo uberioris esse possit utilitatis, edenda mihi visa est Oratio, ut rationem exprimens, qua utraque historia conjunctim tractetur. Atque hoc utilitatis studio factum est, ut nunc demum edatur. Nolui eam emitte-
re nisi locis suis magis expletam, et magis omnino ad illud editionis propositum informatam. Quod emendandi refingendique negotium suum sibi tempus vindicavit. Adducebar sic continuo ad Antiquos demum Recentioresque Oratores, et scriptores etiam alios, evolvendos, percurrentes, subinde etiam totos legendos. Argumenti enim rite tractandi difficultas in dies mihi major apparebat: praesertim, cum tractandum mihi esset non accuratâ quadam disputatione,
qua

qua judicii rationes ordine tradi et copiose exponi possent; sed ejusmodi nimirum scriptione, quae tota est ab illâ argumentatione et rationum expositione aliena. Quapropter quod explicare disceptando et fusâ oratione satis perspicue potuisssem, id exprimere paucissimis verbis debebam. Atqui hoc rite peragere in amplissimo argumento, atque ita peragere, ut quisvis unus te sequatur, ad rerum summam adducatur, nec peculiaribus causis adhaerescat, dici non potest quam sit difficile. Quo magis quod de utrâque et Eloquentiae et literarum aetate judicium enunciaveram, illud examinare denuo et majore etiam evidentia proponere studebam. Sed, qui editionis moram mirentur, pauci erunt vel nulli. Unusquisque hoc facile dabit muneris mei occupationibus: quibus sane distractus de castigandâ refingendâque oratione vix cogitare potui. Qui vero hoc ipsum mirentur, au-
sum

sum me fuisse, non tantum castigare eam, sed etiam fere totam refingere, plures erunt et forte multi. Et his quod respondeam vix invenio, nisi hoc unum, idque ingenuo confitendum, totum me acquievisse in legentium indulgentia, quippe unice spectantem institutionis meae fructum.

Scrissi mense Septembre, anno MDCCCV.

ORA-

ORATIO
DE
ANTIQUA ELOQUENTIA
CUM RECENTIORE
COMPARATA.

ORATIO

DE

ANTIQUA ELOQUENTIA CUM RECENTIORE COMPARATA.

Nulla facile res magis diversum in utramque partem judicium subiit, quam Antiquarum studium literarum. Fuerunt, qui nil praeclarum, elegans, venustum existimarent, nisi ex Antiquis literis ductum. Fuerunt item, qui nil, nisi inutile atque minutum, duci posse ex iisdem literis affirmarent. Illi, quo majore

A

ri-

ribus Antiquos laudibus extollerent, vehementer contemnebant Recentiores. Hi Recentiores vehementer laudabant, quo majore cum contemptu Antiquos despicerent. Et nil negligebatur, quo utraque defenderetur sententia. Illi enim, quidquid apud Veteres praeclarum reperirent, id omne continuo arripiebant, complectebantur, admirabantur, supra rem ac veritatem ornabant. Hi, quidquid magis etiam praeclarum reperiri apud Recentiores putarent, illud ad aspernandos, deridendos, illudendos Veteres conferebant. Utrique suae ipsi sententiae tenaciter adhaerebant, hanc unice tueri ac propugnare studebant, ne suspicati quidem, se posse errare. Caeterum, ut vehementissime inter se altercabantur, ita longissime in utramque partem a vero et probabili discedebant. Atque horum exemplo et auctoritate factum est, ut etiam nunc Antiquae illae

li.

literae ab aliis unice tractandae, ab aliis prorsus negligendae, a nonnullis etiam, tamquam juventuti noxiae, fugiendae existimentur.

Et tamen summae est non tantum utilitatis, sed etiam necessitatis, ut hac de causâ prudenter judicemus. Sic enim unice nostra nobis institutio vere prodesse poterit. Scilicet Antiqui aevi, a tenerâ inde aetate, et linguas addiscimus, et libros legimus, et leges percipimus, hoc maxime consilio et proposito, ut quae hinc perceperimus, in aevi nostri usum conferamus. At vero, si neutrius aevi veram rationem cognoverimus, quomodo vel ex illo fructum accipere audebimus, vel huic nos accommodare poterimus? Quomodo ex utroque ad nostram ipsi utilitatem proficiemus? Ignorabimus sane, an dona ab antiquitate accipere tutum sit: ignorabimus item, an dona haec, qualiacunque tandem, nostrae esse aetati noxia

possint. Neque profecto reperiemus, Antiquos praeferat an Recentiores ad nos ipsos excolendos praeceptores adhibere. Stabimus vero tamquam in bivio quodam, itineris incerti, nunc antiquitatem, nunc nostram aetatem intuentes, dubitantes continuo, utram malimus adire, et vero in perpetuum dubitaturi, quippe qui neutram satis cognoverimus.

Equidem saepe numero considerans, quantum referat, juste vulgo an perversè de Antiquarum studio literarum existimetur, utilissimum fore judicavi, si accuratior aliquando Veterum cum Recentioribus comparatio exhiberetur. Ipse, per literarum et historiarum viam ad aliquem iudicii fructum tendens, sponte subinde in huiusmodi, qualemcunque tandem, comparationem incidi. Et, quandoquidem jam porro easdem et literas et historias doctrinae studiosis traditurus sum, haud ineptum existimavi, si in
pro-

provincia hacce suscipiendâ de Antiquo aevo cum Recentiore comparando verba facerem. Ita sane et duplicis hujus provinciae meae vim et efficaciam demonstrare, et ad eandem cum fructu administrandam mihi ipse viam aperire possem. Sed hoc argumentum cum latius patere videretur, quam quod hujusmodi contineretur oratione, hanc ex eo partem delegi, *Antiquae Eloquentiae cum Recentiore comparisonem*. In quo delectu, Auditores, si forte prudentiam desideretis, nil sane, quo me tucar, afferre possim. Quid enim ego, hac ipse infantia, dicere de Eloquentia sustineo? Hoc unum valeo, ut Vestram mihi benevolentiam implorem. Sin vero consilium propositumque meum comprobetis, hanc sane probationem lubens accipiam. Illud enim in primis spectavi, ut, quicumque literarum studiosi in illo adhuc dubitationis bivio versantur, hi accuratius existi-

mare cum de Antiquo tum de Recentiore aevo discant, iidemque ex utroque, tam ad communem hominum utilitatem, quam ad naturae ipsi suae perfectionem, efficaciter proficere studeant.

Aggredienti autem mihi hanc materiam tractare, diversae continuo occurrunt tractandae ejus rationes. Versantur mihi ob mentem Antiquae Eloquentiae et Recentioris monumenta, quorum ingentem esse varietatem et infinitam fere copiam video. Haec igitur singula describebam, atque ita descripta ad comparisonem adducam? Nil sit profecto ineptius, et magis ab hoc tempore alienum. An vero loca ex utroque monumentorum genere excitem, e quibus ipsa generis diversitas cognoscatur? Apertius hoc quidem, sed vereor, Auditores, ut Vobis magnopere placeat: vereor, ut me ferre

re

re possitis aliorum orationes recitantem. Malim igitur aliam rationem, magis et Vobis et huic loco accommodatam. Velim utrumque oratorum genus considerare, utriusque virtutes ac dotes primarias notare, atque ex his veluti notis utriusque speciem quamdam et effigiem conformare Vobisque proponere. Sic cernetis, tamquam in picturâ quadam, utriusque Eloquentiae rationem, habitum et quasi formam. Ac simul ita judicabitis, utra utri praeferenda, utri in hoc formae iudicio pulcritudinis palma tribuenda sit. Ego vero opiniones Vestras non antevertere, neque Vos in Eloquentiae sive Veteris sive Recentioris admirationem rapere conitar. Eo si forte perveniatis, non meâ sane descriptione, sed Vestro ipsi iudicio adducti eritis. Ingredimur enim continuo ipsam rationis ac prudentiae viam. Hac tendemus ad eum quasi locum, unde, tamquam e speculâ,

res gentium cum Antiquarum, tum Recentiorum observemus. Inde attendemus, utri gentium generi majores opportunitates ad Eloquentiam tractandam fuerint, utrum hanc artem adducere ad suam vim et auctoritatem magis valuerit. Ita utriusque Eloquentiae habitum ac formam conjectando nobis informaverimus. Atque tum demum convertentes nos ad multa illa et varia Eloquentiae monumenta, indeque cum Antiquae tum Recentioris speciem quasi decerpentes, conjecturam ad iudicium exigemus, ut utriusque Eloquentiae imago, qualiscumque tandem, sed vera atque ad dijudicandum apta, quasi ante oculos nobis appareat.

Atque hanc jam, quam diximus, viam ingredientibus, hoc nobis continuo quaerendum videtur, qua potissimum ratione ingenii facultates ad Eloquentiam tractandam exerceantur. Facultates enim illae, quamvis naturae mag-

nae,

nae, opportunitatibus quibusdam opus habent, quibus cum ad vim suam exserendam proliciantur, tum ad peculiarem quandam artem tractandam adducantur. Feruntur Musae circa fontes et rivos jucundissimis locis degere. Et his sane opportunitatibus ad ipsam Poeseos virtutem informatur ingenium. Ibi enim continuo excitatur, expanditur, per totam rerum universitatem diffunditur, concipiens perpetuo venustissimas rerum formas et imagines, et emittens e se ipso, fontis perennis instar, nova quaeque et mirabilia, quae nullos non mortales advertant, nullos non, pariter ac loca in quibus existerunt, mira voluptate perfundant. Ibi simul animus ad summa omnia et magnifica excitatus, suo ipse impetu ingenium concitat, acerrimo pulcri magnique sensu imbuat, ad summam sublimitatem educit. Unde sponte et continuo oratio existit luminibus distincta,

sublimitatis plena, ipsam referens excelsi pectoris efficacitatem. Parem sane pectoris efficacitatem referre item debet Eloquentiae oratio. Sed haec non ita erumpit, non ita sine consilio emittitur, non ita tanquam e fonte in omnes promiscue partes effunditur ac divagatur. Habet vero certum propositum, tendit unice ad excitandam in hominum animis persuasionem, atque ita in pari virtute atque efficacitate disparem habet formam. Efficacitas illa ratione regitur, cum rerum peritiâ conjungitur, ad prudentiam componitur. Ita minorem habere impetum videtur, sed parem habet, et majorem fere, gravitatem. Ad hunc autem orationis quasi habitum non conformatur ingenium, quamdiu sibi ipsum in illis Poeseos locis relinquitur: sed in ipsâ hominum frequentia, ubi unâ maxime persuasione opus est, hic demum ad disferendi prudentiam et Eloquen-

quentiae omnino gravitatem informatur. Igitur sua item loca habet Eloquentia, nec nisi in mediis civitatibus quaerendi sunt Oratores. Neque tamen in omnibus aequae ad artis facultatem exerceri possunt. In quibus totus populus ad continentiam compositus, non magnopere litibus agitur, ibi non opus est persuadendi arte, non artis studio excitantur ingenia, nullus existit alicujus nominis Orator. Quo minus mirandum, non magnopere a Lacedaemoniis Eloquentiam esse cultam. Hi illam pectoris efficacitatem acriter sane dicendo prodebant, ac prodebant ita, ut cum summâ prudentiâ conjuncta appareret: sed nimirum et naturâ ipsi suâ et institutione ad continentiam ac temperantiam conformati, persuadendi studio duci non poterant. Ita istam sensuum altitudinem et rationis prudentiam breviloquentiâ significarunt, eloquentiâ significare non valuerunt.

runt. Haec non existit nisi ex persuadendi necessitate, quae sola ad persuadendi facultatem exercet ingenium. Quapropter in illis demum civitatibus Oratores quaeramus, in quibus summae continuo sive de possessionibus, sive de honoribus controversiae agitantur: in quibus cives per has controversias in contrarias partes distrahuntur, singuli jus suum omni ratione vindicare, universi justitiam et aequitatem tueri student; atque ita summa sensuum studiorumque contentio prudentiae quadam observatione temperatur. Neque dubitandum quin summam illic orationis vim et efficacitatem, ad ipsam Eloquentiae rationem compositam, inventuri simus. Quodsi orationem volumus, quae simul etiam praeclarorum studiorum significationem habeat, Graecas plerasque civitates respiciamus. Ibi summam gloriam omnes omnino cives summis studiis appetebant. Videmus illic in
illa

illâ gloriæ viâ ad summa omnia universos pro-
ruere, singulos cum singulis concertare, juve-
nes evolare, viros conniti, fenes, ætate gra-
ves, tamen admonere, adhortari, incitare,
adjuvare, omnem ætatem, omnem conditio-
nem, omne civium genus summâ æmulandi con-
tentione et ferri et prorumpere. Illic certe Elo-
quentia ipsa hæc studia referre debuit, debuit
referre altissimos quosque animi sensus, et ani-
mum omnino humilium abjectarumque rerum
contemptorem, magnarum unice ac sublimium
admiratorem. Sed ipsas has civitates paullo
attentius consideremus, attendamus in iis Elo-
quentiæ opportunitates.

Gentes illæ tantis studiis ferventes, tran-
quille degere in suis civitatibus non poterant,
sed per controversias, quas diximus, in factio-
nes erant divisæ, acerrimas illas, ac furore
subinde contra se invicem excitatas. Accede-
bat,

bat, quod in nonnullis earum, praesertim Athenis, incredibilis esset populi levitas, qua magis etiam alebatur partium illud studium. Sic continuo gravissimae seditiones oriebantur, in quibus factiones, adversus se invicem irruentes, omnia caede et sanguine replebant, divina humanaque omnia commiscebant, aliquando totam civitatis rationem conturbabant atque immutabant. In his turbis nulli non affectus, nulla non studia, nullae non cupiditates acerrime se exferebant. Flagrabat prorsus ambitio et dominandi studium. Unusquisque omnem animi impetum profundebat, omnem mentis efficaciam intendebat, facultates omnes ac vires colligebat, ut, in tantâ animorum concitatione, ipse furentem multitudinem adverteret, ipse unus universam teneret. Ita existebant qui fervidam ex ardente pectore orationem emitterent, dicendo in hominum animos invehentur, hos
tan-

tangere, percellere, tractare, modo ad iram concitare, modo ad lenitatem flectere, modo resistentes ac reluctantes verborum pondere opprimere ac superare quaerent. Et alebatur continuo dicendi studium istâ populi levitate. Poterat oratio, efficaciter emisâ, tamquam ventus aliquis vehementer erumpens, totam hominum multitudinem, quocunque vellet, inflectere, quidquid obstaret dejicere, quidquid resisteret summovere, quoquoersum efficaciam suam et impetum diffundere, ubivis persuasionem, imo vero assentiendi studium, idque acerrimum, excitare. Poterat Orator eandem assentientem multitudinem ex tantis commotionibus ad tranquillitatem componere, totam sibi conciliare, ad sui studium atque admirationem abripere, ac persuasione universam civitatem ducere, regere, gubernare. Tantaе auctoritatis spes in nullo non crecto pectore acerrimum debet.

bebat Eloquentiae studium concitare. Non poterant juvenes hujusmodi orationem audire, hujusmodi Oratorem intueri, quin ad parem ipsi et persuadendi vim et gloriae splendorem continuo adspirarent. Quidquid intus efficacitatis, quidquid ardoris, quidquid generosi spiritus habebant, id continuo excitabatur, per totam mentem diffundebatur, omnes ingenii vires intendebat, ipsum ingenium ad nil non suscipiendum, nil non perficiendum et erigebat totum et quasi amplificabat. Informabantur sponte ingenia ad parem Eloquentiae facultatem, et ipsa sic ars ad summam perfectionem evehebatur, omnes certe opportunitates habebat, quibus ad suam ipsa virtutem invalesceret.

Neque dispar fuit Romanorum ratio, nisi quod minor his levitas, severitas et constantia major fuerit. Quo factum, ut majorem etiam
di-

dignitatem et auctoritatem ipsorum Eloquentia adscisceret. Caeterum eadem apud illos studia, eadem seditiones, eadem Eloquentiae opportunitas et origo.

Jam vero, si Recentiores gentes circumspiciamus, ubi tandem par artis studium reperiamus? Scilicet nusquam par exstat Reipublicae atque institutorum ratio: nusquam par habetur Eloquentiae honos. Sunt sane regiones, in primis Anglia, ubi perimultae sunt Eloquentiae opportunitates. Sed peregrini esse debemus in Antiquis civitatibus, si has cum illis comparandas censeamus. Tanti studii, tantae ad gloriam concertationis, tanti Eloquentiae ardoris vix hodieque umbra apparet. Habemus certe dicendi argumentum, sacrum dico, quod, Veteribus ignotum, unum est in paucis ad Eloquentiae gravitatem et vero majestatem accommodatissimum. Et hoc profecto eâ est a Recen-

B

tio-

tioribus ubertate, copiâ, magnificentiâ tractatum, ut ipsi cum Antiquis Oratoribus concurrere videantur. Sed defuit iis patria, in qua sponte Eloquentia esset nata, et suam ipsa plane alacritatem proderet. Defuit iis civitas, quae tota Eloquentiâ regeretur. Quodsi in eo genere, quod memoravimus, tantopere excellerunt, ad hanc obtinendam excellentiam ipsa eos argumenti praestantia et divina auctoritas multum adjuvit. Atqui non argumentis, quae tractet, censenda est Eloquentia: censenda est suâ ipsa virtute: hac nullum non argumentum, quamvis etiam abjectum, illustre reddit.

Ergo, si opportunitates consideramus, quibus cum Antiquo tum Recentiore aevo ad Eloquentiae facultatem informari potuerunt hominum ingenia, majores sane apud Antiquos quam apud Recentiores, et summas omnino apud Antiquos reperimus. Et dubitemus, Auditores, utri Elo-

quen-

quentiam ad majorem provexerint praestantiam? Mihi quidem, saepe numero de hac arte et totâ ejus ratione et amplitudine cogitanti, una omnium artium ad tractandum difficillima visa est: visa est omnino, nisi maximâ quadam et peculiari prorsus ingenii exercitatione, ad justam rationem tractari non posse. Non enim ad Eloquentiae facultatem sufficit, si unice ingenium, vel ad summam solertiam et fingendi felicitatem, vel ad parem prudentiam judicandique subtilitatem, excultum sit. Alterâ ingenii virtute contenta est Poësis, alterâ Philosophia. Utramque vero sibi expostulat Eloquentia, atque expostulat ita, ut nec fingendi studium judicii severitati, nec rationis diligentia ingenii elegantiae officiat. Primariae igitur mentis facultates tum singulae acui, intendi, ad plenum vigorem exerceri, tum universae conciliari inter se, ad justum concentum componi debebunt:

sic tandem ex hujusmodi totius mentis quasi harmoniâ Eloquentiae existere facultas poterit. Et hæc ipsa facultas, ut efficax fiat ad infinitam quandam hominum multitudinem solâ oratione et tenendam et ducendam et cohibendam et vero regendam, quam assidue, quam acriter exercitari debet! Hic profecto incredibile opus est artis studio, non tali illo, quale in singularibus hominibus continuo exardescit, mox vero friget: sed ejusmodi nimirum, quale in universâ quadam gente ardentissimâ et continuâ concertatione assidue alitur, ad nullas non difficultates superandas concitatur. Tale profecto studium una cum caeteris opportunitatibus omnibus in Antiquis fuit civitatibus, et fuit tam efficax, ut sponte cives ad difficillimae artis facultatem fingerentur toti et informarentur. Ita illic Eloquentia satis habuit nutrimenti, quo insigniter invalesceret, nec tantum

tum

tum ad vim et efficacitatem intenderetur, sed ad summam simul copiam, ubertatem, amplitudinem expanderetur. Et eadem ad tantum robur increscens non impedimentis et angustiis cohibebatur, quominus se commoveret, suam ipsa vim exfereret, vires quasi suas tentaret et explicaret; sed, propter summam studiorum omnium libertatem, tamquam in libero spatio, explicare eas, quamvis amplissimas, totas potuit. Et quidni sic ibi, his quasi viribus sublata, ipso majestatis habitu ad summam persuadendi vim et auctoritatem furrexerit?

Verumtamen, quo probabilius de utrâque Eloquentiâ auguremur, accuratius etiam et interius examinemus omnia. Inquiramus Recentioris etiam originem. Observemus proprium utriusque et peculiarem habitum et quasi colorem. Sic utriusque demum diversas dotes,

diversas virtutes, diversam omnino laudem tenebimus. Hic vero

Alter ab integro rerum mihi nascitur ordo.

Consideranda enim erit ipsa cum Antiqui tum Recentioris aevi ratio et veluti indoles, quae peculiari quodam et diverso fingendi, inveniendo, cogitandi, existimandi modo cernitur. Ex hac aevi indole, tamquam stirpe, et Antiquae et Recentiores artes diversâ ratione expullularunt, et, veluti rami, diversâ formâ ad sublimitatem suam increverunt. Igitur non seclusâ aliquâ aquulâ delectemur: ulterius progrediamur: accedamus eo, unde universum artium flumen utroque aevo erupit: considere-mus omnino istam artium stirpem et prima ejus initia. Atqui haec stirps

quantum vertice ad auras
Aetherias, tantum radice in tartara tendit:

ten-

tendit enim in imas et remotissimas historiae gentium latebras et penetralia. Ergo hanc perquiramus historiam, ut Antiquarum et Recentiorum artium, et simul sic Eloquentiae, peculiarem formam habitumque percipiamus.

Artes et literae Graecorum ex Joniâ et caeteris Asiaticis coloniis exstiterunt. Hic sublimi placidoque coelo efflorescere coepit Poësis, mirâ gratiâ ac venustate commendata. Pari commendatione Musica prodiit, quae Poësi conjuncta, ad Deos celebrandos ac fortia majorum facinora ornanda inserviebat. Utraque per has regiones se laete diffundens ubivis elegantiae venustatisque studium excitavit, unumquemque ad virtutem, honestatem, fortitudinem adhortans. His se deinceps conjungens Philosophia, una cum elegantiae amore prudentiae rationisque studium per totam Graeciam dissemnavit. Exorti sunt ubique philosophi,

poëtae quidem fere omnes, sed sapientiae studio-
si, neque a Poësi retinentes, nisi orationis quem-
dam cultum et habitum. Horum plerique pa-
triae suae praefuerunt, cives suos monendo hor-
tandoque juverunt, civitatem suam ferendis le-
gibus ad firmiorem conditionem adduxerunt.
Existiterat jam antea Eloquentia e discordiis il-
lis et seditionibus, quas paullo ante memoravi-
mus. Sed illa ab his tum philosophis magis
ad rationis habitum, et prudentiam omnino,
temperari coepit. Adhibita ad res ferias et
summi omnino momenti proponendas, a Poë-
feos lascivia remisit, ad gravitatem composita
fuit, tota fuit ad persuadendum accommodata.
Ita sensim sensimque ad suam dignitatem per-
venit, rudis quidem primum, sed vere flexani-
ma ac summae auctoritatis plena, quippe quae
auctoritatis causam usurparetur. Tandem Athe-
nis miro venustatis dignitatisque cultu enituit,

nil

nil tamen a Poësi ornamenti assumens, sed ipsam referens Philosophiae gravitatem.

Alia fuerunt apud Romanos artium initia. Non enim ita sponte et eo habitu effloruerunt. Una Eloquentia et sponte et summâ auctoritate exstitit. Exstitit enim ex ipsa civitatis constitutione, ac persuadendi commovendique studio ad suam dignitatem increvit.

Sic igitur Antiqua Eloquentia neque aliunde adscita est, neque ab aliis artibus cultum accepit: ex ipsis prodiit Antiquis civitatibus, ac prodiit ita, ut fucum omnem averfaretur, suâ se formâ fatis commendans.

Recentiorum Eloquentiam et artes etiam cæteras a prima inde origine repetere, difficillimum est negotium. Graeci ab Aegyptiis, Phoenicibus, aliis gentibus, quibus antiquissimo aevo commixti fuerunt, multa adsciverunt, sed ita semper, ut suam tamen cogitandi agendique

rationem fervarent, suam veluti personam sustinerent, omnino, se ipsi quasi fingerent atque ad suam se formam componerent. Hoc satis et lingua eorum indicat, vix ullum habens imitationis vestigium, et ipsam fere naturam exprimens. Romani permulta certe a Graecis assumerunt, et plura adeo, quam ab Aegyptiis Phoenicibusque Graeci. Verumtamen in plerisque negotiis semper sui manserunt. Et, quod ad Eloquentiam attinet, hanc, ut diximus, ipsi pepererunt, neque per Graecorum imitationem plane immutarunt, sed ornarunt tantummodo ac laetificarunt. Dispar est plane Recentiorum nationum conditio. Hae ex diversarum gentium colluvie exstiterunt, ab aliis alia assumerunt, atque ita quidem, ut ad adscitia illa se totas componerent. Omnia in iis non tantum aliena, sed ex diversis fontibus hausta atque adeo undique commixta. Et
hac

hac de causa haud in promptu est bene definire, unde proprie repetenda sit artium tractandarum apud Recentiores ratio.

Possit aliquis opinari, repetendam eam esse a renatarum literarum tempore, saeculo XV et XVI. Neque profecto dubitandum, quin, tractandis tunc antiqui aevi monumentis, ad eam humanitatem et culturam adducti sint homines, ut artium colendarum et acerrimo studio incitarentur, et meliorem, quam antea, methodum sequerentur. At vero jam tunc temporis hominum et ingenium et tota indoles ad certum quemdam habitum erat conformata, qui habitus illo antiquitatis studio prorsus immutari non poterat. Et vero adeo abhorrebant illius saeculi studia, mores, opiniones ab Antiquorum ratione, ut horum legendis libris non ita penitus converti commutarique possent. Ergo, ut rem accuratius indagemus, altius eam repetenda

tamus atque in media nos barbarorum tempora conferamus.

Barbararum gentium, quae antiquum elegantiae lumen exstinxerunt, ac novam per totam Europam rerum fere omnium rationem induxerunt, dici non potest, quam utilis sit ac fructuosa historia. Continet enim initia et semina omnium eorum, quae deinceps ad nostra usque tempora ad summam hominum admirationem acciderunt. Quae sane mirari desinent qui aevi istius historiam cognoverint. Et vero, nisi hac cognitâ, plene existimari de Recentioribus linguis, moribus, opinionibus, institutis, legibus nullo modo potest. Sed, uti septentrionales gentes novam rerum civilium, ita Arabes peculiarem artium doctrinarumque formam instituerunt. Hi fervido nati ingenio maxime trahebantur Poëseos studio, et carminibus suis vehementer

mentem indebant cogitationis impetum et ipsum omnino ingenii sui fervorem. Itaque in Hispaniam progressi hunc mentis ardorem sensim sensimque communicare cum Europaeis gentibus coeperunt. Unde apud has incredibilis quaedam in suscipiendo audacia, in agendo temeritas, in cogitando fingendoque vis et alacritas exstitit. Quem ingeniorum ardorem mores ejus aetatis plane retulerunt. Ex hac autem aevi ratione Poësis nata est Arabicae simillima fictionum plena, imaginibus illustris, luminibus splendens: eademque ita eluxit, ut literis omnino suum colorem affunderet. Caeterum Arabes res etiam Mathematicas et Philosophicas colebant: in primis in Oriente. Illic Mansurus, saeculo VIII, ita Philosophiae Geometriaeque favebat, ut non tantum quidquid Oriens in his rebus praestitisset, hoc omni ratione adsciscere studeret; sed etiam Aristote-

te;

telem, Euclidem, alios scriptores Graecos Arabice verti juberet. Haec eorum Philosophia, cum depravatâ deinceps istius temporis Theologiâ commixta, Scholasticam peperit philosophandi methodum. Quae mox per universos fere Europae populos diffusa est atque propagata. Haec satis de Arabibus. Videmus, qua ratione et artes et doctrinas tractaverint. Ac facîle jam intelligimus, quam vim haec eorum ratio in Recentiora tempora habere debuerit. Scilicet eam habuit, ut doctrinae quidem ad Geometriae Philosophiaeque diligentiam exigerentur, magis observandi assiduitate, quam fingendi solertiâ colerentur, omnino, ad propriam ipsarum methodum tractarentur: artes vero et literae partim Poësin istam Orientalem referrent, magis ad perstringendos percutiendosque sensus, quam ad mulcendos eos leniendosque componerentur: partim

tim a Geometriae diligentia non abhorrerent, sed ordinis, distributionis, perfectionis, artis omnino studium haud obscure significarent.

Ita, ni fallimur, artium ac doctrinarum Recentiore aevo ratio exstitit, atque, ut tandem ad Eloquentiam veniamus, haec item inde formam suam et colorem assumere debuit. Nusquam enim, ut Antiquo aevo, ex civitatum conditione et constitutione nata est, et nusquam adeo naturae illum vigorem prodere potuit. Adhibita fuit ad res sacras, unde summum sane splendorem accepit. Nec tamen ejusmodi haec fuit opportunitas, ut inde ad vim suam propriam plenamque dignitatem invalesceret. Igitur aevum ipsa suum referre debuit, ac produxit ita, ut poëtica non nihil ornamentum afferret, diligentiae caeteroquin limaeque studium prodens.

Jam vero, si Antiquam respicimus Eloquentiam,

tiam, quo eam discriminè ab hac Recentiore distinctam existimabimus? Discrimen hoc multis partibus cernitur, sed paucis illud verbis complectamur. Statuamus igitur, in Antiquâ Eloquentiâ naturam, in Recentiore artem dominari: illam ex aevi sui conditione sponte natam, ultro commendari naturae integritate, hanc autem, studio cultam, artis adhibere commendationem.

Et hinc quidem continuo cognoscemus utriusque Eloquentiae dotes virtutesque omnes: si quidem haud ignoremus, quae sit naturae, quae item artis vis. Erunt tamen forte qui dubitent, Vetusne sit hoc nomine, an Recentior praeferenda Eloquentia. Incredibilis est nimirum artis efficacia: speciem habet perfectionis, qua capit fere vulgus hominum, facile credentium et firme etiam tenentium, nil comparari cum tantâ pulcritudine posse. Et mirum

rum

rum fit sane, nisi e tanto aliquando ordinis, distributionis, perfectionis studio stupenda quaedam pulcritudo existat. Dubitandum vero an illa hinc umquam possit existere, quae naturalem superet. Gaudet natura innumerabilibus dotibus, miram ipsi gratiam conciliantibus, quae exprimi imitando non possunt. His carens artis illa scilicet perfectio frigeat necesse est. Et, qualiscumque assumatur fucus, ornatus, splendor, assumi non potest naturae vis, quae, intus latens, vigorem quoquo versus et alacritatem diffundit, nec ornat solum omnia sed animat plane. Et dubitemus, artisne praeferenda sit, an naturae commendatio? dubitemus, Auditores, artisne sagacitate, an naturae vi plenius informari Eloquentia ad suam dignitatem possit? Ne vero quisquam dubitet. Fateamur potius, Eloquentiam, veluti plantam, ex antiquâ unice ratione, disciplinâ, ci-

C

vi-

vitatis constitutione, tamquam e suâ terrâ, eum trahere et succum et vigorem potuisse, quo laete cresceret, magnifice exsurgeret, ad summam virtutem invalesceret: eandem vero in aliis regionibus, ubi alia institutio, aliae leges, alia studia, diversa ab antiquis sunt omnia, in his igitur regionibus, fovendo quidem et colendo et nullo non artificio adhibendo ad mirabilem plane speciem exurgere posse; verum enim, quippe suo non gaudentem coelo atque solo, suum contrahere robur et vigorem, ad suam se extollere formam et majestatem, nullo modo posse.

Neque sane in hac opinione nostrâ partium quis studium suspicabitur, quasi Antiquis magis quam Recentioribus faveamus. Isto non studio ducuntur quicumque regiam sequuntur, quam Historia recludit, judicandi viam. Hac nos viâ eo adscendimus, unde, quasi e speculâ,

lâ, aevi cujusque rationem, artium universarum origines, diversam earum apud diversas gentes formam attenderemus. Quibus sane spectandis praejudicatae opiniones omnes, si quae in animis haeserint, cedere continuo atque evanescere debent. Atque ita haec spectantes ingenue enunciavimus sententiam nostram, nec Antiquis faventes, nec Recentioribus parcentes, illud vero secuti, quod sive verum sive probabile videbatur. Jam vero aliam deinceps instituamus disquirendi rationem, quo certius aliquando ad sanum hac de causâ verumque judicium perveniamus.

Descendamus igitur, Auditores, ab hac gentium consideratione ad ipsa contuenda Eloquentiae monumenta. Et contuebimur sane illa mirâ cum voluptate. Nitent enim summo humani ingenii splendore, atque una cum elegantissimis venustissimisque omnibus excelsi cujusque

pectoris sensus,] eosque altissimos,] exprimunt. Neque Oratorum hîc tantum, sed nullius non] praeclari scriptoris opera considerata sunt. In Veterum certe scriptis, philosophicis etiam et historicis, ubivis apparet Eloquentia. Apud hos enim artium elegantiorum veluti chorum primo duxit Poësis, laete exultans, ac gratiâ ipsa suâ nil non ad se alliciens. Sed Poëseos munus deinceps suscepit Eloquentia, vi suâ et majestate, miris illecebris temperatâ, trahens ad se et artes omnes et Philosophiam item, et ipsam tandem Poësin. Etenim veluti flumen, magno cum impetu proruens, ac nil non obvium secum abripiens, artes etiam caeteras, tamquam amnes laete prolabentes, suo cursu suscepit, secum ipsa abduxit, vi suâ implevit, eandem ire quasi gravitatis, majestatisque viam coëgit. Sic omnia conformari ad Eloquentiae habitum

coc-

coeperunt, ipsi denique poëtae, apud Romanos maxime, eam imitati sunt. Tanta esse vis debebat praeclarissimae artis, quippe apud Antiquos quidem, et sponte natae, et naturae vigorem, candorem et quasi amabilitatem cum auctoritatis significatione prodentis.

Atque intuentibus jam nobis haec tot ac tam varia Eloquentiae monumenta, quid tandem de iis existimandum videbitur? Cernitis continuo, Auditores, in ipsis illis Antiquis diversitatem quandam. In Romanis certe magis copiam, ubertatem, amplitudinem, in Graecis magis simplicitatem, sed majori efficaciae conjunctam, admiramur. Fere suspicemur, in Romanis illis non nihil artis subesse, occultatum istud quidem, ut vix appareat, sed subesse tamen. At hoc cuicunque fit, nihili esse videtur et evanescit plane prae Recentiorum operum splendore. Insignis ille sane, et quamvis

artem prodens, prorsus admirabilis. Quantus hic verborum ornatus! quantus sententiarum ordo! quanta omnino totius orationis commendatio! Verum enim ne artis hinc illecebras nimis admiremur. Caveamus ab iis prudenter. Caveamus in primis, ne antiquitatem contemnamus. Etenim vel fallor, vel attendentibus nobis, atque in utramque vicissim partem oculos convertentibus, illa olim antiquitas magis placebit. Sed hoc quo magis pateat, detis mihi hanc veniam, Auditores, ut virtutes utrimque primarias Vobiscum observem. Ita sensim sensimque utriusque aliquando Eloquentiae imaginem mente complexuri sumus.

Atque hoc quidem continuo patet, majorem esse Antiquae, quam Recentioris Eloquentiae simplicitatem. Simplicitatem dico non formae quamdam tenuitatem negligentiamve, sed nativam formae gratiam ac venustatem, cum pari
con-

cōjunctam gravitate, quae quemvis capiat, teneat, moveat. Recentior Eloquentia similem habet formam, nec tamen parem. Adest quidem gratia, venustas, pulcritudo: adest in primis ornatus: sed deest nativus color et habitus. Antiqua eo incedit habitu, qui magis magisque te capiat: Recentior autem eo, quem continuo admireris atque suspicias, haud facile tamen ames. Minor est Antiquae luxuries, simplicitas major: major item sublimitatis vis. Certum haec iter non sequitur, huc illuc vagatur, per multas variasque ambages ducit: erres continuo, jucunde quidem, sed erres tamen et quaeras subinde, quo tandem perventurus sis. Ne vero quaeras: sensim sensimque ad sublimem locum accedis, ubi pulcerrimum habebis et plane novum spectaculum. Ad idem forte spectaculum Recentior item Eloquentia adducet, neque tamen

tam jucunde spectabis. Non sponte eo et quasi errando, sed ex industriâ accesseris: accesseris per illustrem quandam splendidamque viam. Si gravitatem quaerimus, nil Antiquâ Eloquentiâ gravius: sed par est in gravitate simplicitas. Ipsâ te simplicitate moveat. Tota oratio leniter placideque decurrit: decurrit autem perpetuo: sic ad intimum tibi sensum facile permeabit. Senties ejus vim: commoveri te senties: cogitabis, fuscipies praeclara omnia: stimulus latebit; tamen, qualicunque tandem stimulo, eo eris sponte adductus, quo vix te trahat vis et pertinacia. Tantam efficaciam habet orationis gravitas, ea quidem, qua movere solet Antiqua Eloquentia. Aliâ movet Recentior, nec pari cum efficaciâ. Tentamur, sollicitamur; aegre vero permovemur. Adducamur forte eo, ut probemus praeclara facinora, laudemus qui ea susceperunt, non item eo,
ut

ut ipsi fuscipiamus. Adest omnino stimulus, nec latet: admovetur manifesto: admoveri cum videmus, sed videmus magis quam sentimus. Deest nempe illa orationis continuïtas, perpetuitas, æquabilitas, illa sententiarum connexio, illud omnino orationis quasi flumen, quod, æquo cursu, constanti gravitate procedens, obiter nos fuscipiat, provehat, auferat. Hoc flumine decurrit Eloquentia Antiqua: pergit per devia subinde loca, per ambages item: pergit tamen continuo, et sic quidem, ut sponte impedimenta dimoveat, ad propositum perveniat, persuadeat. Recentior ad idem persuasionis propositum accedit item, pervenit nonnumquam, numquam vero eadem cum gravitate pervenit.

Verumtamen, ut his dotibus ac virtutibus Antiqua Eloquentia Recentiore[m] vincit, ita suas habet utraque propriasque laudes. Utraque

arbori est similis, Antiqua vigenti, procerae, caeterum ad suam se formam libere explicanti: Recentior minus vigenti, sed arte studioque ad cultiorem adeo elegantioreque formam conformatae. Illam amni compares, recens ex fonte prolabenti: hanc amni item, sed procul a fonte, ac multis variisque spiris per hortulos serpenti. Alter amnis ipsum habet naturae impetum: alter vix movetur. Tamen habet uterque, quo nos alliciat, ille sui ipsius, hic artis praeterea hortulorumque commendationem.

Sed haec de leniore ac sedatiore orationis genere, quo non minus alii, historici in primis et philosophi, quam oratores utuntur. Jam vero evehamus Eloquentiam in suum locum, id est, in populi concionem. Hic demum virtutem omnem exferere, vires omnes explicare possit. Atque huc quidem Antiquus Orator eandem
ad-

adducit alliciendi, conciliandi, movendique facilitatem cum summa gravitate conjunctam: sed adducit haec omnia multo etiam magnificentiora. Praestat se continuo illius civitatis civem, quae caeteris civitatibus gentibusque omnibus se parem sentit. Tantam plane auctoritatem sustinet. Ita quidquid habet indolis, quidquid naturae, quidquid animi spiritusque, id omne exserit, explicat et quasi effundit, ut ab ejus ore pendens, ipsam tibi audire patriae vocem, ipsam tibi adspicere tantae civitatis majestatem, videaris. In Recentiore Oratore ipsa vis patriae non ita se prodit: prodit se vero divini muneris dignitas. Ab ipso quippe Deo legatus, qui homines adhortetur, gravitate utitur tanto officio consentanea. Nil non adductum ad movendum, percellendum, persuadendum: omnes sententiae ad hoc propositum accommodatae: plenae omnes fervoris,

ris , spiritus , persuasionis : verba interdum grandia , ampla , eademque lenioribus subinde et quasi conciliantibus excepta. Concedes gravitatem fingi majorem non posse. Suspicies Oratoris auctoritatem , et tantae auctoritati ipsam existimabis orationem parem. Ast idem fateberis , majorem etiam esse Antiqui Oratoris efficacitatem. Habeat hic minoris dignitatis argumentum , adhibeat minorem industriam , curam , diligentiam. Non possumus non haec omnia excusare. Et vero vix ea animadvertimus. Scilicet artem non cogitans ipsa movente natura provehitur. Altus ille animi sensus eum totum agitat , totum ad sublimitatem , magnificentiam excitat , totum ad persuadendum incendit. Volvitur quasi sponte oratio , impetum illum et ardorem spirans : diffunditur haec per concionem totam , omnes mentes attingit , impellit , inflammat : emittuntur verborum qua-

si tormenta, quae vel hebetissimos animos excitant: emittuntur sententiarum lumina et tamquam faces, quae universos corripunt, inflamment, ubivis veluti incendium alunt. Ita omnes animi affectus moventur, omnia studia fuscitantur. Ita Orator suum ipse sensum cum aliquot millibus hominum communicat, hos universos tenet, ducit, et, tamquam victor, regit plane. Victoriā pariter plenam reportabit item Recentior Orator; reportaverit vero eam non suā ipse vi, sed argumenti adjuvante auctoritate. Ipsam non sperat naturam, illum non habet naturae impetum, qui unus maxime debet movere. Compensat haec arte quadam, mirabili quidem, sed non satis efficaci. Athletae cernes imaginem ad tantam formae praestantiam et majestatem conformati, quantam in homine nec suspicatus sis umquam nec finxeris. Admiraberis singulorum membrorum vires, universorum concinnitatem,

to-

totius staturae vim et veluti impetum: obstupescere plane majestate tantâ, deprehendes omnino divinitatis quandam significationem. Sed cernes imaginem. In Antiquâ Eloquentiâ ipsum habemus athletam, hominem plane, sed viventem, spirantem, agentem, pugnantem. Non tanta est in singulis partibus perfectio; sed per universas vigor est diffusus. Vita et ardor per totam se conformationem exserit. Nil artis apparet, sed sponte omnia ad majestatem conformantur, sponte existit habitus ille, quo nullus esse gravior, nullus magnificentior potest. Hoc habitu, hoc naturali vigore procedens Eloquentia antiquas civitates, Romanam maxime, ad nil non audendum, ad ipsum terrarum orbem expugnandum erexit, generi humano, tamquam in illustri quodam exemplo, et naturae efficaciam et suam ipsa majestatem spectandam praebens.

No-

Notavi, Auditores, utriusque Eloquentiae dotes atque virtutes, quotquot in utriusque aevi monumentis insigniter apparent. Sed, quo magis tota haec comparatio et omnis ejus vis ac ratio percipiatur, illud in primis tenendum, quod supra vidimus, Recentiore Eloquentiam non nihil a Poësi assumsisse. Inde factum, ut minus in eâ perfectio quam perfectionis studium appareat. Scilicet alia est Eloquentiae, alia Poëseos natura. Illa ad populum ducendum in mediis civitatibus nata est: haec quibusvis in locis ad acriores animi sensus exprimendos existit. Altera igitur auctoritatem habere cum sapientiâ conjunctam debet: altera libere ingenio frui et nullis non studiis indulgere potest. Et suum est utrique propriumque propositum. Eloquentia mone-
re, docere, hortari studet: Poësis excitare
mavult. Illa judicii auctoritate hominem mo-

ver.

vet, gubernat, ad consilium suum ducit: haec, sensuum ardore elata, propellit nos quo ipsa prorumpit, suo nos ardore imbuens. Dispar igitur esse utriusque oratio debet. Magna est Eloquentiae modestia. Quidquid ad persuasionem afferat, non ex longinquo, non ex maximis quibusque rebus repetet: erit hoc omne sponte natum, sive ex ipso argumento, sive ex opportunitate quadam. Exsistent ita comparationes simplices, tenues, atque, ut videri possit, abjectae, ductae quippe ex vitae usu et ex communi observatione; sed eadem, tempore locoque adhibitae, eam habebunt magnitudinis speciem, eam exferent persuasionis vim, ut nil videatur ad commovendum efficacius. Non fugit sane dictionis sublimitatem nec metaphoras illustriores, sed non item sectatur: esse mavult quam videri sublimis. Poësis tantam non curat prudentiam: nil tamen in
ejus

ejus oratione desiderabis. Si delectare te velit, undique apparebunt delectationis illecebrae, veneres, lepores, elegantiae omnes: apparebunt autem ita, ut ullo vix studio adhibitae videantur. Tantopere te capient et delectatione perfundent. Sin movendi habeat et impellendi consilium, effertur subito per rerum universitatem,

Omnia pervolat late loca,

undique decerpit rerum imagines, venustas, illustres, magnificas, quæ, veluti lumina, per orationem vagantes, extemplo nos advertunt, in admirationem rapiunt, atque, varium continuæ splendorem emittentes, in omnes nos partes versant, ad omnia nos studia excitant, totum nobis animum agitant, concutiunt, subinde etiam, tamquam fulminis eruptione, stupore defigunt.

Sic aliam habet Poësis, aliam Eloquentia,

D

per-

persuadendi rationem. Illius autem persuasio efficacior, hujus constantior erit. Poësis enim suo nos numine impellens, quocumque velit, efficacissime adducet; sed quocumque progressos nostra nos olim revocabit ratio. Eloquentia rationem sibi nostram continuo conciliat, tum suâ nos auctoritate concitat: sic ipsi olim sponte proruemus. Furore haec illo non agitur, sed valet auctoritate. Hac freta nihil prorsus desiderat. Et quamvis sit pertinax, quam movere debet, hominum turba, non aliunde arma petit, non Medusæ objicit speciem. Talem non amat, quamvis efficacissimam, persuasionis vim. Pronunciabitur vero oratio, prudentiæ plena, ad conciliandum accommodata, nec minus ad excitandum, commovendum, impellendum efficax, et tota exprimens altum magni pectoris sensum, spiritum, instinctum, ipsam omnino auctoritatis vocem.

cem. Nec sua deërit orationi vis. Quin etiam ita eris totus ad contrariam sententiam adductus, ut hanc in perpetuum unice probaturus sis. Scilicet non impetu tantum et animi sensu ad assentiendum perveneris, sed sensum probaverit ratio. Et ipsam sic tueri sententiam poteris. Acceperis enim quasi Palladis scutum, quo omnem Medusarum, ipsam fulminis vim confutabis.

Propter tantam naturae, propositi, orationis, persuasionis diversitatem, nullum est Poësi cum Eloquentiâ commercium. Eloquentiae certe non licitum est Poësi se conjungere. Suam utraeque vim et commendationem habent. Hanc debent tueri nec se invicem confectari. Nisi enim suae maneant, et suam ipsae dignitatem sustineant, nil sanum proferre, nil integrum poterunt. Exsistent ex illicito, tamquam Ixionis, complexu Centauri forte quidam mirationem fa-

cientes, vulgique plausum moventes, sed vulgo relinquiendi: ipsius non existet naturae integritas.

Haec autem cerni, haec unice vigere in utriusque operibus debet. Sic demum Eloquentia vere nos movebit: sic ipsum oratione prodet veri et magni sensum et veluti vocem, qua penitus nos flectere, ad omnia magna adducere possit. Hac voce contenta sit, nec alienam affectet. Suis ipsa viribus nitatur: sic magnifice exsurget, ad sublimia omnia tendet, summam habebit majestatis laudem. Haec laus non speranda est ex imitandi studio. Totam Poësi similem numquam se reddet, nec ejus alas assumere, nisi decurtatas, potest. Has vero ne asumat. Concutiet enim misere has alarum quasi reliquias, et magno sane strepitu, volabit vero numquam.

Verum enim in tantâ utriusque artis dissimilitudine inest tamen quaedam similitudinis species.

cies. In omnibus fere Eloquentiae operibus, ad veram et nativam rationem confectis, reperiemus subinde ejusmodi loca, quae Poëticae facultatis vim et inventionem referant, ac metro ligata, Poësin haud dedeceant. Affundit nobis oratio suavitates ejusmodi, ut quasi per flores spatari et ipsis Gratiis interesse videamur. Prodeunt subinde metaphorae, assimilationes, comparationes, sponte quidem et quasi casu ac fortuito, sed prodeunt, atque ita sublimes, ita illustres, ut ipsum nobis Poëseos splendorem referant. Et vero quibus Poësis figuris utitur, easdem fere omnes adhibet Eloquentia. Sed ne hac similitudinis specie decipiamur. In his usurpandis figuris suam utraque vim et naturam servant: usurpant enim eas suo utraeque et plane diverso proposito, Poësis, ut excitet, Eloquentia, ut doceat: illa, ut animum nobis totum, sive ad delectationem exhilaret;

five ad studiorum fervorem inflammet : hæc, ut rationem animi impulsu juvet, atque ad veri iudicium adducat.

Jam vero hoc maxime est utriusque artis discrimen, quod non satis attendit Recentior ætas. Illam Poëseos virtutem ad animum unice vel mulcendum vel perstringendum haud alienam existimavit ab Eloquentiæ dignitate. Ita suam peperit Eloquentiam, ornatiorē sane quam formosiorē, sed suum tamen et nomen et decus auentem. Scilicet qui mediā ætate per magnam Europæ partem exstiterat ingenuorum fervor, nullas non artes trahens ad Poëseos sublimitatem, hic non ita statim deserbuit, sed in recentiora perpetuo tempora vim habuit. Unde horum temporum Eloquentia poëtici non nihil splendoris suscepit, conformata caeteroquin ad artis perfectionem.

Ergo, quod per universam nostram compara-

tio-

tionem constanter tenuimus, admiremur in Antiquâ Eloquentia naturae integritatem, vigorem, majestatem, in Recentiore vero ornatum, artisque efficaciam, non pariter quidem, admiremur tamen.

Satis diximus de utriusque Eloquentiae indole, formâ et virtutibus primariis. Sed, quo plenius etiam de nullis non utriusque dotibus existimemus, non nihil etiam observemus. In artibus illis, quae initio inter Graecos cultae sunt, in primis censenda est Musica. Haec quantam vim in eorum Poësin habuerit, nemo non intelligit. Utraeque enim artes ita secum invicem conjunctae erant, ut alteram ab alterâ sejungere ineptum videretur. Sed eadem non minorem vim habuit in ipsam Graecorum linguam. Ab eâ enim repetenda illa linguae suavitas et quasi harmonia, quae non minus in singulis vocibus, quam in universis

sententiis et totius orationis cursu observatur. Hac dote vel nos etiam ita capere et tenere haec lingua solet, ut e profâ etiam oratione musicum percipere contentum videamur. Quodsi nos sic advertit, justae pronunciationis ignaros, quid tandem efficere in ipsos Graecos debuit? Romani nec linguam habuerunt, nec pronunciationem usurparunt, hac Musicae dote, Graecae comparabilem. Tamen, si publice pro rostris dicebant, ita variare vocem, ita eam per varios sonos vel attolere vel remittere solebant, ut, qui hanc vocem modulatione regeret, tibicinem adhiberent. Hinc existimemus de Graecorum pronunciatione. Sane hac Musicae ope audientem multitudinem eum in modum capere, tenere, abripere debuerunt, ut ipsam veluti incantando delenirent.

Hac dote caret plane Recentior Eloquentia, et dici vix potest, quanto sit Antiquâ hoc nomi-

mine inferior. Quamquam id vulgò non aestimatur. Aegre enim mente complectimur, quod sensibus non percepimus: et facile sic negligimus, quae nostris ipsi, vel oculis non vidimus, vel auribus non accepimus. Quodsi quis velit de antiquitate existimare, in eam se totum insinuare debet, ut ipsis Veteribus interesse, ipsos adspicere, ipsos audire sibi videatur. Is demum perceperit, quae fuerit et qualis in totam antiquitatem Musicae vis, idemque tenebit, quantam hinc persuadendi vim Eloquentia antiqua susceperit.

Jam tandem, Auditores, ad judicium accedamus. Antiquam Eloquentiam cognovimus integrum esse incorruptumque naturae foetum, naturali gratia, dignitate, gravitate enitentem, atque, ipsâ movente naturâ, ad summam magnifice majestatem exsurgentem. Recentiorē vidimus ad similem se, et majorem subinde

speciem erigere, sed minori majestate. Et utri-
jam, Auditores, palmam tribuimus? Non du-
bitandum profecto. Suam arti laudem ceda-
mus, sed naturam praeferamus. Victrix pro-
nuncietur Antiqua Eloquentia! Haec enim vi-
delicet, quamvis nec cultum, nec ornatum, nec
omnino commendationem curans,

vera incesu patuit Dea.

Grave profecto negotium peragere sustinui-
mus, Auditores, qui res tantas ac tam amplas
ad comparisonem et judicium adduxerimus.
Verum enim non magnopere verendum, ne
temere et leviter judicaverimus. Omnem cer-
te in causâ cognoscendâ diligentiam adhibui-
mus. Non unum aliquem primarium, five ex
Antiquis Oratoribus, five ex Recentioribus con-
sideravimus. Horum fane singulorum virtus
ad tantam accessisse, quantam significavimus,
prae-

præstantiam non videtur. At vero, ut aliquando de causâ constaret, ipsam examinavimus universae Antiquae Eloquentiae et universae item Recentioris laudem. Sic sponte nobis utriusque imago occurrit. Et vero cavendum duximus ab isto quorundam hominum errore, qui ex Oratoribus unice, sic propriè vocatis, Eloquentiam censent. Sunt hi profecto in primis spectandi, sed non ita, ut historici, philosophi et aliorum generum scriptores negligantur. Per hos enim omnes, quamvis lenior, ipsa tamen artis vis diffusa est. Ex hoc errore informata est Eloquentia, quasi unice in populi concione versata, numquam a tantâ gravitate remittens, numquam ad leniorem rationem, ad res gestas enarrandas, quaestiones difficilioresexplicandas descendens. Unde fingi coepit vehementior quam lenior, magis ad ambitionis ardorem concitata, quam ad sua-

suadendi amabilitatem remissa, et tantum non referens Junonis speciem intonantis illud:

Flectere si nequeo Superos, Acheronta movebo.

Atqui descendit, apud Veteres quidem, ad omnis omnino generis descriptiones, narrationes, quin imo ad familiares confabulationes. Ad has igitur etiam nos convertimus, et hinc deum cognovimus Antiquae illius Eloquentiae lenitatem. Ita in summâ istâ auctoritate miram quamdam suavitatem, in tantâ illâ majestate parem fere amabilitatemprehendimus. Deprehendimus, eandem illam Junonem a lenitate non abhorrere, suavius subinde loqui, amorum interdum zonam induere, ac nil non sic et flectere et sibi conciliare. Et sane, Auditores, ut ab omni omnino parte et penitus quaestionem cognosceremus, ipsam utriusque Eloquentiae originem, omnes utriusque opportunitates

con-

consideravimus. Spectastis mecum antiqui aevi mores, simplicitatem, candorem. Spectastis item vetustarum civitatum conditionem, summas illarum discordias, seditiones, tempestates, continuam rerum fluctuationem. Attendistis affectus, appetitus, cupiditates, omnino studia, quae ex tantâ rerum agitatione exsistere debuerunt. Et quidni nunc, his omnibus consideratis opportunitatibus, quidni concedamus, Auditores, e studiorum illorum, tamquam fluctuum, agitatione, concitatione, aestu, fervore et quasi spumâ, tamquam alteram Venerem, sponte exstitisse Eloquentiam, eâ certe exstitisse amabilitate simul et majestate, qua majorem fingere nequeamus?

Quodsi huic Veterum Eloquentiae suam non opponere possunt Recentiores, hos tamen ne contemnamus. Forte utrisque, quamvis dissimilia, tamen paria fuerunt studia, ut in qua-

li-

licumque dissimilitudine par effecerint. Atque sic quidem ultro redimus, unde ab initio profecti sumus, ad Recentiorum cum Antiquis comparationem. Ad eam nunc porro instituentdam, certe leviter adumbrandam, ex hac de Eloquentiâ disquisitione paratiores aptioresque accedemus. Progrediamur igitur eo, et propositum sic nostrum totum expleamus.

Est illa fane permagna Recentiorum laus, quod multas artes, neglectas antea aut perverse tractatas, justâ ratione coluerint atque ad summam utilitatem produxerint. Physicam fane, Chemiam, similes summæ indagationis artes minus apte attigerant Veteres. Hi enim, in causis rerum indagandis, fingere fere, quam quaerere, ingenium exercere, quam diligentiam adhibere maluerunt. Unde graves nasci errores debuerunt, quibus artium illarum fructus fere totus interciperetur. At enim

ve-

vero in eosdem Veteres ne gravius invehamur, prohibent artes illae et literae, quas soli illi ad verum ingenii, humanitatis, urbanitatis fructum coluerunt. Suâ ipsi naturâ toti ad Musicae studia conformati, ad hujus suavitatem orationem informarunt, ad hujus harmoniam Poësin exegerunt, ad hujus omnino vim et rationem artes elegantiores universas tractarunt. Ita in omnia artis opera eum modum, eum ordinem, eum habitum induxerunt, qui nil habebat quod offenderet, nil quod displiceret, nil quod in totâ conformatione desideraretur. Unde exstiterunt Statuariae illa et Architecturae opera, ipsum fere Musicae concentum referentia, ad parem certe harmoniae perfectionem confecta. *Μουσικὸν* enim ipsi et Musicam continuo perfectionem quasi intuentes, nil omnino tolerare *ἀμύμονον* poterant; sed pulcri illam perfectique ideam integram et plene debebant expri-

primere. Et eandem in omnibus eorum monumentis etiam nunc inpresam et vigentem videmus. Viget illa ubivis sublimitatis vis, quae extemplo nos commovet, corripit, ad omnia praeclara aufert, ad perfectas pulcritudinis imagines attollit. Nec viget ea tantum per artium monumenta, sed per scripta eorum omnia, per Poësin totam, per ipsam Philosophiam. Haec nobis hominem describens cam prodit naturae humanae effigiem, qua nulla esse magnificentior, nulla *μυστικτέρα* potest. Assimilantur lyrae chordis mentis animique facultates primariae: monstratur singularum efficacia, virtus, et quasi tensio: significatur universarum inter se ratio et in se invicem vis. Fingis tibi continuo mirabilem concentum, quovis alio concentu superiorem, qui ex his quasi chordis existere debeat. Percipis hujus concentus vim omnem et sublimitatem. Ad tantam

tu

tu ipse praestantiam, ad tantam praestantiae commendationem, ad tantam omnino naturae perfectionem et harmoniam adspiras, omni studio tendis, ipse jam eam animo sentis, jam oratione prodis, jam propositis exferis, effers te ipse supra humana atque abjecta omnia, haec tamquam absurda et absona averfatus, unice appetens pulcra quaeque et consona, unice meditatus naturae ipse tuae ad summam praestantiam perfectamque harmoniam conformationem. Neque per morum unice disciplinam diffusa est haecce Musicae vis: per totam dominatur philosophiam et partes ejus omnes exhilarat. Sive Politicam respicimus, ea laudatur perfecta civitas, ubi ad communem salutem omnes cives apti sint, omnia consilia spectent, omnes cupiditates dirigantur, omnia studia, omnes affectus conspirent, e qua veluti contentione ea existat harmonia, quam

E

uni-

unice fervare legislator debeat. Sive Physicam respicimus et Astronomiam, eadem in his etiam et Musicae vis et harmonia lucet. Imo vero quae a nobis Musica vocatur, rudis est imitatio sublimis illius et perfectae harmoniae, quae in mediâ rerum universitate ex justâ rerum universarum ratione, ex discordi fiderum concordia existit, atque una maxime Deorum et animos mulcet et felicitatem auget. Ita Veteres ad Musicam nati, ipsa Musicae vi instigati et quasi afflati, hanc vim perpetuo spirarunt, quoquoersus diffuderunt, tam in artium opera, quam in disciplinas fere omnes, nil non ad elegantiam, ad sublimitatem, ad concinnitatem exhilarantes, nil non ad pulchram illam perfectique ideam informantes, ipsis etiam erroribus gratiam quandam plane concinnam conciliantes. Ita ipsa apud eos natura Musicae commendatione exhilarata prodiit, suo omnia
nia

nia spiritu imbuit, suo omnia odore perfudit, omnia ad Musicae elegantiam laetificavit, atque artibus universis humanitatisque disciplinis et Musicae colorem et suam ipsa vim ac volenti vitam indidit.

Quodsi ab hoc Vetustatis spectaculo ad Recentius nos aevum convertamus, parem naturae vigorem, par artium lumen, parem rerum omnium integritatem ac sinceritatem non deprehendemus. Neque tamen spectare nolemus. Uti illic ingenium rationem regebat, atque vitam etiam ad inventa sua probanda cogebat, ita hîc ratio ingenium gubernare, a fingendi temeritate avertere, ad iudicii severitatem adducere coepit. Species rerum, quamvis venustae, quamvis se habitu et colore commendantes, neglectae sunt et contemptae: ipsae res, ipsae rerum virtutes indagari coeperunt. Ita omnes evanuerunt specierum gratiae, omnis

E 2 perit

periit fictionum flos; sed mansit veritas. Hujus studio et amore nil non susceptum, nulla non industria adhibita. Neque in disciplinis tantum subtilioribus haec elaboravit industria: traduci coepit ad universa fere literarum, imo artium genera. Progreditur per haec omnia ratio, ubivis adhibens et inquirendi studium, et perscrutandi diligentiam, et dijudicandi subtilitatem. Nullius non artis natura indagatur, propositum attenditur, virtutes aestimantur, leges et regulae praescribuntur. In nulla non arte pulcri, venusti, decori, magni, sublimis, principium quaeritur. Et haec omnia eo maxime spectant, ut accuratius existimetur de ipso artium fonte, ingenio humano. Hoc acerrimis studiis exquiritur, neque tantum per artium indicia, sed maxime etiam per historiae vestigia. Et quid historiam, quid artes loquimur? Ipsae linguae, pulcerrimi illi ingenii
hu-

humani foetus, eadem diligentia examinantur; ad idem propositum adhibentur: adhibentur tamquam specula, in quibus mentis humanae primas notiones, nativas opiniones, ipsum opinionum progresum, cursum, variam viam, diversitatem omnem dilucide ac distincte adspiciamus. Sic omnia tamquam instrumenta usurpantur, quibus ad justam certamque et rerum universarum et hominis in primis notitiam via aperiatur. Neque frustra sane tantopere laboratur. Hanc ipsam jam ingresso quasi veritatis viam, novâ tibi luce omnia apparebunt; et, misis Antiquorum fictionibus, de nullis non rebus diligentius existimabis. Id nobis praestitit et praestat etiam nunc Recentiorum industria. Nempe quas olim ab Arabibus acceperant artes Mathematicas, has deinceps ad ingenii non tantum exercitium, sed maxime ad cognitionis fructum tractantes, ad ipsas res,

ad ipsam naturam explorandam adhibuerunt. Unde et nata sunt praeclarissima inventa, et existit simul illa indagandi assiduitas, iudicandi severitas, rationis omnino exercitatio et perfectio, quae una maxime et profuit nobis et deinceps profutura videtur. Et sic intelligitur, quantum absit, ut ingenio adhuc indulgentes rationem coercemus. Disrupit ratio vincula ista omnia, in omnes partes progressa est, res omnes accuratius observavit, ubivis veritatem investigavit, atque ita, suam sibi et libertatem et auctoritatem vindicans, ad se ipsum cognoscendum coëgit ingenium.

Sive igitur Antiquum, sive Recentius aevum consideremus, utrimque profecto, quamvis diversum, praeclarum habemus spectaculum. Illic viget ingenium, ac vigoris abundantia lacte luxuriatur, quoquo versus emittitur, artes parit elegantiae plenas, ipsam referentes

luxu-

luxuriantis naturae alacritatem. Sed idem, suis finibus non contentum, pari alacritate et vero petulantia in severiores disciplinas exultat, atque ita in his haud pauca disturbat. Hic ratio dominatur, veritatis studio omnia explorans, et summam fane prudentiam. Lente ac sensim; sed constanter procedit, atque constantiae efficacia ad veri tandem cognitionem pervenit. Eadem vero in artes etiam venustiores auctoritatem exercens, nativam iis hilaritatem adimit, ad fictam eas simulandam cogit. Ita Antiquum respicientes aevum, omnia videmus quasi verno tempore expullulare, efflorescere, reviviscentis naturae vigorem ac sanitatem spirare. Recentiorum vero aetatem considerantes magis deprehendimus culturae studium. Et videmus sane doctrinas quasdam, illinc traductas, ad praeclaram laudem et utilitatem increescere. Videmus earum nonnullas,

ramquam pingues arbores, ramos suos divitiis graves super totum fere terrarum orbem extendere, uberrimosque fructus generi humano ubi-
vis veluti porrigere. Tantos nobis fructus tulit ingenii humani maturitas. Sed huic maturitati (faciendum enim) nativus ille vigor cedere debuit.

Jam vero ne diutius moremur controversias illas de Veterum ac Recentiorum praestantiâ. Nimirum quaecumque artes ab illo unice ingenii vigore commendationem habent, ut Poësis, Eloquentia, caeterae, elegantiores nominatae, has apud Veteres solos vere vigentes reperi-
mus: quaecumque vero nisi studio, industriâ, culturâ ad firmitatem et verum fructum adduci non possunt, ut Chemia, Physica, Medicina, Astronomia, Mathesis, quae applicata vocatur, aliae, has a Recentioribus demum ad veram praestantiam utilitatemque excultas cernimus.

Et

Et nemo non intelligit, quare nec in subtilioribus artibus Veteres, nec in elegantioribus Recentiores excelluerint. Veteres elegantiam illam suam, qua unice delectabantur, nullis non negotiis affundentes, severioribus etiam disciplinis affuderunt. Hae igitur splendere quodammodo, sed alieno plane et falso colore debuerunt. Sic Astronomia et aliae artes cultum quemdam et ornatum a Musicâ susceperunt, sed ejusmodi illum, ut in summâ commendatione adscititius appareret ac repudiandus videretur. Recentiores autem Mathematicam diligentiam, qua has ipsas subtiliores doctrinas ad summam hominum utilitatem coluerant, in artes etiam venustiores transtulerunt. Ita hae minus ad pulcri venustique sensum, quam ad rationis iudicium tractari coeperunt: minus nativâ se gratiâ commendare potuerunt, magis ordinis limaeque studium referre debuerunt.

Quodsi sunt, qui, tamquam in bivio stantes, dubitent adhuc, Veteresne adire, an Recentiores, illosne sequi, an hos, praestet, hi cessent dubitare. Neuiros sequamur solos; sed, utramque vicissim viam ingressi, utrosque pariter penitus cognoscamus. Haec nobis notitia veram doctrinam, veram doctrinae utilitatem pariet. Sic enim exempla habebimus, ad quae artes singulas rite tractemus. Sed hoc mittamus. Sunt alia longe maiora. Scilicet artes ac disciplinae, ut partim ab Antiquis ingenii felicitate, partim a Recentioribus rationis diligentia ad justam rationem cultae fuerunt, ita nobis universae summam praestantiam ante oculos apparebunt. Cernemus eas, non pari universas, sed suo singulas colore distinctas: neque aegre feremus, si in aliis maiorem, in aliis minorem, in quibusdam nullum splendorem animadvertamus. Admirabi-

bimur vero in magnifico et amplissimo spectaculo justum rerum omnium modum. Nec sane immerito ad summam admirationem pervenerimus. Spectaverimus enim in eodem hocce artium universalum spectaculo ipsum mentis humanae lumen, unde tantus splendor, per diversos colores, sed juste distributos, artibus universis affusus fuerit. Spectaverimus tamquam in expressâ imagine mentis humanae praestantiam, ad quam per tot saecula ad nostra usque tempora accesserit. Et sic quidem ad nostram ipsi utilitatem insigniter spectando profecerimus. Cognoverimus enim, quid illi adhuc praestantiae desit, quid summae semper perfectioni obfuerit. Quo cognito, facilius dimoveri haec impedimenta poterunt, ut ultra sic mens humana ad suam se perfectionem explicet.

Ad hoc autem et peragendum et obtinendum

ma-

ma-

magis Recentiorum methodus, quam Antiquorum usurpari debet. Non enim in tanto negotio fingendi temeritate, sed examinandi assiduitate utendum.

Atque eo quidem nomine mirabiliter se commendant Recentiores. Quid enim magis, quid illustrius prodesse generi humano possit? Quare non mirandum, esse etiam nunc, quod initio diximus, qui Antiquas literas negligendas, certe ad interiorum rerum indagationem inutiles existiment. Et habent hi, quo suam sententiam defendant. Verum enim ne Antiquos ita penitus repudiemus. Fatendum omnino, in graves eos errores incidisse, sed fatendum etiam, ipsis eos erroribus ad multa et praeclara inventa accessisse. Acceserunt eo ingenii illa velocitate, sagacitate et naturali illo impetu, quo in omnes partes proruentes nil non appetiverunt, nil non continuo apprehenderunt, nil

non

non specie commendatum, tamquam verum, as-
sumserunt. Ita cum falsis non nullis multa etiam
vera assecuti sunt. Nempe concitabatur hic
ingenii impetus intimo illo veri sensu, qui,
velut instinctus quidam, ingenium animat, ra-
tionem antevertit, et verum vix adspectum ili-
co dijudicat. Hoc eos non latet qui Graeco-
rum linguam paullo interius inquisiverunt. Haec,
tamquam ipsorum effigies, impetum illum et
sensum totâ conformatione exprimit, et, quae
impetu sensuque illo perceperunt, peculiaribus
vocibus reddit. Quo magis et totius antiqui-
tatis et hujus item linguae studium ad veritatis
indagationem fructuosissimum habendum est. Et
omnino eodem hoc studio ad parem vim nos-
trum ipsi ingenium, quoad ejus fieri potest,
exercere debemus. Non enim existimemus,
solâ nos ratione ad tanta tamque praeclara in-
venta pervenire posse. Gubernet haec mentem

no-

nostram et dirigat ad cujuscunque momenti disquisitionem; sed accedat item ingenii afflatus: sic unice ipsa mens movebitur. Nec vero intimum illum veri sensum negligamus. Plus huic sensui genus humanum debet, quam vulgo existimatur. Hoc imbuti poëtae ad tantam pervenerunt inveniendi solertiam, ut divinitus inspirari, futura vaticinari crederentur. Et nemo facile, erectiore indole natus, non sensit aliquando poëtici illius enthusiasmi vim, quae una est ad verum reperiendum efficacissima. Haec vitae tempora, quamvis fere brevia, totius sunt vitae instar. Illis enim quidquid antea obscurum, reconditum, impeditum videbatur, ipsâ apparet luce clarius: illis amplissima etiam rerum argumenta uno eodemque obtutu percipiuntur simul et dijudicantur: illis tandem quae menti obversantur, non extrinsecus suscepta, sed ingenio parta, ipsâ in-

ingenii vi emisſa videntur: recentia ſunt plane et nova omnia, omne certe habent novitatis lumen. Et hoc enthufiaſmo partae ſunt pleraeque notiones, quae verae Poëſeos propriae, luce ſua rationis iter illuſtrarunt. Hanc nos lucem petamus, nec diligentia illa et ſubtilitate nimium nitamur. Magnam haec vim habent ad errores evitandos, et juſtam ſemper viam tenendam: ad progrediendum vero vix ullam habent.

Itaque e noſtro aevo in Antiquum nos continuo transferamus, inſinuantes nos totos in fingendi iſtam et inveniendi judicandique vim ac rationem. Imbuamur in primis lingua illa Graeca, quam omnes laudant, omnes ad inventa ſua explicanda adhibent, omnes unice perfectam exiſtimant, pauci vero penitus percipiunt. Miramur ſuavitatem, ubertatem, Muſicam vim, dotes caeteras, quae vulgo ſolae celebrantur.

At-

Attendamus maxime vim istam singularem, ex ipso illo enthusiasmo ortam, quae in legendo nos continuo advertere, miris sensibus imbuere, totos nos erigere, totos nos ita auferre, ita ad novam cogitandi rationem adducere solet, ut quae animo concepimus, unâ hacce lingua, et nullâ prorsus aliâ, exprimere possimus. Hac linguae vi imbuti, atque poëtici cujusque ingenii totiusque antiquitatis virtutem percipientes, sensim ipsi ad eandem rationem conformabimur, eodem ardore incalescemus, eodem spiritu animabimur, eodem plane enthusiasmi fervore ad veri sensum et vaticinationem inflammabimur. Ita aliquando quidquid ingenii, quidquid indolis, quidquid intimae efficacitatis naturâ habemus, hoc omne Antiquitatis quasi communicatione fuscitabitur, prolicietur, expandetur, impraegnabitur, et praeclarissima inventa, tam probabilitate quam novitate

tate insignia, tamquam foetus, pariet. Tum vero cedat deinceps ingenium rationi, Poësis Philosophiae, inveniendi solertia examinandi diligentiae. Examine ratio hos ingenii quasi foetus, spurios et falsos abjiciat, germanos et veros ferver, et hos solos qua valet prudentia ad summam generis humani utilitatem informet. Sic demum nostro ipsi usu experiemur, quam insigniter proficit ad nova invenienda antiquitatis studium: firme tenentes, eo utiliorem futuram Recentiorum methodum, quo magis cum Veterum ratione jungatur.

Atque admirabile est, ut nos ipsos ita simul exculturi simus et quasi amplificaturi. Exferemus quippe efficacitatem nostram totam, non minus ingenio fruemur, quam ratione utemur, atque, utramque facultatem ad nostram ipsi perfectionem exercentes, summo ipsi lucebimus mentis humanae splendore.

F

Ad

Ad tantas utilitates, tam publicas illas et communes, quam nostras etiam, fructuosum esse potest Antiquarum studium literarum. Ne tamen has percipientes caeteras relinquamus. Percipiamus item eas, quae ad humanitatem referuntur. Et hae quidem eo minus negligendae sunt, quo magis aetate nostrâ ingenii elegantiae obesse coepit rationis diligentia. Versati enim in intimis naturae recessibus, atque abdita quaeque et obscura perquirentes, sensim sensimque homines a venustatis studio alienantur. Atqui non eâ conditione homines nati sumus, ut in istâ semper obscuritate moremur. Nostrâ ipsi naturâ ad artes elegantiores et trahimur et convertimur. Ne vero naturae resistamus. Prodeamus subinde ex tenebris his nostris ad Antiquarum artium lucem, ut magis magisque fuscipiamus humanitatis ac venustatis colorem, eundemque in nullis non negotiis,

in

in ipsa naturae indagatione continuo referamus.

Caeterum, Auditores, videmus, qua methodo severiores artes a mediâ inde aetate tractatae sint et tractentur etiam nunc. Intelligimus, quam vim haec methodus in sequentia tempora habitura sit. Sperare hinc licet praëclara omnia. Anxii tamen esse possimus de futura litterarum conditione. Summae illarum, quas diximus, utilitates vulgo non magnopere cognoscuntur. Quotus enim quisque in Antiquorum se ingenia ita totum insinuat? Sic pauci forte relinquentur, qui iuste Antiquitatem colant: caeteros abduxerit Recentioris methodi commendatio. Verum tamen, Auditores, ne de literis illis desperemus. Numquam profecto penitus negligentur. Habent quò suum ipsae honorem tueantur. Habent quò omnis aevi homines alliciant, ad sui admirationem studiumque

trahant. Nempe, quantalibet tandem constantia diligentiae illam observationisque viam sequamur ad verum indagandum; tamen in jucunda subinde diverticula digredi gestiemus. Gestiemus interdum nostro ipsi animo, nostro ipsi sensu perfrui, explere penitus insita illa naturae studia, haurire omnino pectore animoque toto omnem naturae suavitatem, integritatem, sinceritatem. Ita continuo in Antiquitatem ducemur. Hic nosmet ipsi sentiemus et indolis ipsi nostrae alacritatem. Rationem non curabimus, nec rationis auctoritatem: ingenio malemus uti et magis etiam sensu. Hunc suaviter mulcebimus literarum illâ et Poëseos dulcedine, quam cupide degustantes satiari non poterimus, sed percipere perpetuo cupiemus. Sic relaxare studebimus et relaxabimus etiam diligentiae illud et veritatis studium. Figmentis denuo suaviter pascemur: suaviter

spa-

spatiabimur per Antiquae Poëseos elegantias, venustates, flores. Ipsae illae Antiquae fabulae miram in nos habebunt voluptatis vim, quippe nativam totae pulcritudinem referentes. Haec nobis elegantiarum quasi vireta post tantos diligentiae, iudicii, rationisque labores semper perfugium manebunt. Illuc continuo respiciemus, illuc continuo tendere gestiemus. Alliciet nos Philosophia illa, venustatum plena, omnibus omnium artium dotibus ornata, ab ipsis fere Musis et Gratiis ad summam commendationem exhilarata, philosophia tamen, atque sapientiae magistra. Et, qualemcumque hinc demum sive delectationem sive utilitatem percepturi simus, perpetuo nos sane tenebunt aeterna illa germanae venustatis, gravitatis, maiestatis monumenta, Eloquentiae Antiquae opera. Caeterae artes ubivis nasci nec sine laude florere possunt: ut, nisi ipsum habeant Anti-

quitatis vigorem, suo se tamen colore commendent. Eloquentiam nolemus, nisi ex Antiquis ortam civitatibus. Illic demum, tamquam e suâ terrâ, suum succum, suam efficacitatem contraxit: illic omnia conspirarunt ad eam exhilarandam et quasi laetificandam. Media surgebat inter florentissimas artes, ipsum naturae veluti odorem spirantes. Sponte imbuebatur mirificâ illâ Musicae vi, quâ ad animos hominum mulcendos, componendos, flectendos nulla esse efficacior potest. Et multum tamen aberat, ut ab ulla arte sive juvaretur sive sustentaretur. Imo, suum illic tandem spatium pacta, in quo se libere commoveret, ita vim suam totam exseruit, ita ad suam se formam, ad tantam se formae magnificentiam, explicuit, ut caeteras artes, ipsam etiam Poësin, ad majestatis imitationem adduceret. Sic tamquam artium Regina in civitatibus illis colî coepit,

ip-

ipsas civitates suâ totas auctoritate regens. Ad parem gloriam et auctoritatem numquam forte deinceps perveniet Eloquentia, quippe pares haud facile opportunitates nascitura. Et anxii sumus, Auditores, de futurâ literarum conditione? Vel sola haec Eloquentia per faculorum decursum earum nomen perpetuo tuebitur. Hujus enim monumenta numquam neglecta jacebunt; sed, quamvis assidue, quamvis constanter nostram persequamur veri indagandi methodum; tamen non poterimus non respicere subinde monumenta illa, nec contuebimur ea sane, quin ipsam Antiquitatem admirerur penitus et ferme veneremur.

Exposui, Auditores, de Antiquarum studio literarum, in primis de Antiquâ et Recentiore Eloquentiâ sententiam meam. Hanc Vestro totam judicio relinquo, lubens eam prorsus re-

pudiaturus, si quando mihi alia probabilior appareat. Illud tamen probasse mihi videor, errare eos, qui nil nisi inutile atque minutum duci posse ex Antiquis literis existimant. Nec dubito, quin summam earum non tantum suavitatem, sed etiam utilitatem mecum agnoscat. Quare, quod prudenter instituerunt maiores nostri, ut a tenerâ quisque aetate ad literas illas duceretur, hoc nos etiam servandum existinemus: praesertim, cum earum disciplina ad verum eruditionis fructum, ad communem omnium utilitatem, ad vitae omnino usum magis magisque referri coeperit. Et, quandoquidem hanc ipsam literarum disciplinam mihi jam commissam video, ad Vos converto orationem meam, Academiae hujus Curatores, Viri amplissimi, tanti erga me meriti auctores.

Ego, Viri munificentissimi, de muneris hujus

jus praestantiâ atque utilitate non magnopere dicam. Proxime est cum ipsa Antiquae Eloquentiae praestantiâ conjunctum, quam adumbrare quodammodo et pro facultate exprimere studui. Satis igitur dictum, ut percipiat, quanto studio, quanto ardore hanc egomet provinciam et nunc susceperim et deinceps administrare conaturus sim. Nil mihi videri praecarius poterit, quam generosae indolis juvenes per laetos Antiquitatis campos ducere, atque ad Eloquentiae lumen convertere. Sic enim simul et Historiarum auctoritatem, et Literarum elegantiam, et vero utrarumque rite conjunctarum vim, efficaciam, utilitatem continuo perceperint. Quae omnia maxime valebunt ad ipsorum cum ingenium acuendum, tum animum excolendum, tum pulcri venustique sensum poliendum et erudiendum. Tanta me spes ad nî non fuscipiendum et peragendum incitabit:

eademque sic intendet facultates meas omnes, ut, quidquid etiam nunc doctrinae deest (quod lubens confiteor permultum esse) hoc igitur, quoad ejus fieri possit, industria aliquando expleatur. Sic illud olim efficere conabor, ne Vos honoris, quo me ornastis, nec Praeceptores meos studii, quod in me posuerunt, poenitere possit. Horum numquam virorum in me beneficia animo mihi excident. Semper Nodelli, qui me primum erudit atque ad summa quaeque appetenda impulit: semper Wytenbachii, qui me currentem concitavit, in justam studiorum viam adduxit, constanti literarum amore imbuit, universam Antiquitatis rationem docuit: semper Crasii, cui elegantioris Jurisprudentiae gustum: semper Swindenii, cui Mathematicae sublimitatis sensum debeo: semper horum Doctorum in me merita, ad vitae mihi fructum unice efficacissima, ea, qua par est,

est, pietate celebraturus sum. Neque Boschi
item umquam immemor ero, cujus in bonas
artes ardor ad acerrimum earum studium exci-
tavit me continuo et inflammavit. Eademque
praestantissimorum beneficia virorum ne frustra
in me collata videantur, sed ad aliorum etiam
utilitatem fructuosa sint, summâ semper indu-
striâ conntar. Cui proposito aliquando explen-
do Vos jam, Viri humanissimi, opportunitatem
mihi aptissimam dedistis. Quo magis existimare
potestis, quam grato equidem animo hoc à
Vobis munus acceperim. Caeterum curantibus
Vobis, Viri amplissimi, cum Urbis hujus tum
Academiae negotia, ita prospere et feliciter
omnia cedant, ut prudentiae diligentiaeque Ves-
trae maxima quaeque et praeclarissima debean-
tur.

Vos autem cum intueor, Profesores qua-
rumvis doctrinarum eruditissimi, Vester me ad
spec-

spectus mover plane. Nullo sane vitae meae tempore meam ipse tenuitatem magis sentire possim, quam hoc ipso die, quo ad Vestrum collegium, tantâ illud et doctrinae luce illustre, et sapientiae auctoritate grave, ad tale igitur tantumque collegium collega accedo. Profecto Viri eruditissimi, nisi summae eruditioni prudentiaeque Vestrae Vestra par esset erga me benevolentia, totum me conturbaret harum rerum cogitatio. Et nisi hanc benevolentiam in Te item, Saxi, vir gravissime, agnoscerem, prorsus animo desponderem. Ego ne celebrem laudes tuas, cum tuus me pudor prohibet tum infantia mea. At, si considero, tanto me viro et collegam adjungi et adiutorem dari, quis animi mei esse sensus debet? Sed totus acquiesco in indulgentia tua. Habebis me collegam, nec tamen hoc honore exultantem, magis id studentem, ut eo me dignum reddam.

Ha-

Habebis me adiutorem, et industrium sane, sed eundem simul discipulum tuum; quem haud frustra vel docueris vel monueris vel adhortatus fueris. Et dubitem, Vir gravissime, de voluntate erga me tua? Ego vero dubitare non lim. Malim profiteri, huic me voluntati pietate responsurum esse. Et sic quidem, senex reverende, et caeteri viri clarissimi, accedentem me ad collegium Vestrum tali accipiat indulgentiâ, quali Vos ego observantiâ prosequor. Ita ex nostrâ collegii societate fructum capiamus cum ad Academiae emolumentum, tum ad vitae nostrae suavitatem uberrimum.

Jam tandem Vos compello, quotquot humanioribus artibus operam datis, juvenes suavissimi. Ego ad Vos, non ut doctor ad discipulos, neque ut eruditus ad minus doctos, gravi quadam oratione utar. Abhorret haec gravitas ab aetate meâ et vitae consuetudine: abhor-

horret vero a futurâ nostrâ familiaritate. Sed, ut sodales sodalis, diutius sane in his studiis versatus, sed caeterum par, ita Vós ego et alloquar et monebo. Neque vero eo pertinebit oratio mea, ut Antiquas Vobis literas commendem. Vel fallor, commilitones, vel hac ipsâ disputatione jam satis eas commendavi. Proposui enim Vobis Antiquam Eloquentiam, vim ejus et formam adumbrans. Intellexistis, quanta sit nativæ simplicitatis grátia, venustas, efficacia. Et haec Vobis simplicitas non placet? Atqui eadem per totas est Antiquas literas aequabiliter diffusa. Tali Vos commendatione invitatur antiquitas: nec frustra Vos sane invitaverit. Accedetis ad eam per arduam subinde viam: sed, qualescumque tandem futurae sint viae difficultates, majores etiam erunt itineris suavitates. Dixi paullo ante de linguae Graecae praestantiâ, ubertate et musicâ virtute. At-

ti-

tigi etiam, et expressi, ni fallor, historiarum vim ad literarum utilitatem. Vix credatis, amici, quam suave sit harum rerum studium. Pariter continuo fructus ad delectationem uberrimos, nec minus ad animum reficiendum et recreandum efficaces. Et, quod ad istas attinet vias asperitates, ne hasce, quaeso, nimium curetis. Me assumatis itineris comitem. Ego, si quando difficultates existant, manum Vobis porrigam. Vos, si jucunda alicubi loca deprehendatis, monebitis me et mutuo delectabimur. Ego Vobis narrabo, quales nos et quanta suavitates maneant. Vos mihi perceptas jam suavitates in mentem sensumque revocabitis. Ita haud ingrato itinere ad amoenissimos illos locos accedemus, quo, nisi durus et ferreus, nemo pervenit, quin continuo humanitate imbuatur: ubi, nisi vanus et inanis, nemo moratur, quin prudentiâ fiat ac sapientiâ praestant-

stantior: unde, nisi hebes, nemo redit, [quin ad quascumque tractandas et artes et disciplinas excultus veniat et praeparatus. Agite vero, commilitones, Antiquitatem petamus! Antiquas tractemus literas!

Atque sic quidem, Auditores, (ut ad Vos denuo universos redeat oratio mea) sic igitur, peractis hujus diei solemnibus, hoc unum mihi restat, ut Vestram mihi benevolentiam, et vero indulgentiam, implorem. Quam mihi sane non e vulgari consuetudine, sed ex animi sensu rogandam duco. Scilicet indulgentiam non implorem, qui magno Segario tantillus ipse juvenis succedam? Admirabilis plane erat viri summi doctrina, prudentia, sapientia: admirabilior etiam tanta in tantis virtutibus modestia: quibus laudibus cum summa accederet animi magnitudo, probitas, integritas, dignus erat vir magnus, qui ab omnibus non coleretur

tur

tur tantum, sed simul etiam diligeretur. Tu sane, Segaari, tuo ipse exemplo monstrasti, quanta sit eruditionis gratia, si humanitate commendetur. Utinam hoc ego exemplum haud frustra imitari coner! Utinam, si tu quando ex beata beatorum sede in hanc Academiam respicias, me haud indignum tanto munere agnoscas! Utinam hanc aliquando vim habeat institutio mea, ut literarum studium, non solum ad doctrinae copiam fructuosum, sed etiam ad morum elegantiam, ad disciplinarum incrementa, ad commune hominum emolumentum longe efficacissimum habeatur!





